


孔氏祖庭廣記

附校譌及
續補校

一



孔氏祖庭廣記

附校譌及續補校

(一)

孔元借供

四庫未收書

孔氏祖庭廣記十二卷提要

張金吾藏書志

金孔元措撰。元措字夢得。先聖五十一世孫也。先是元豐八年。先聖四十六世孫宗翰撰家譜。宣和六年。先聖四十七世孫傳撰祖庭雜記。夢得合爲一書。又博考前史。旁參傳記。分門臚載。凡族世名號典禮沿革之始末。及歷代崇奉先聖故事。並詳著於篇。其兩漢至金。林廟碑刻。備錄全文。以垂永久。又圖聖像。廟宇。山林。手植檜等。列于卷首。名之曰祖庭廣記。蓋仙源之文獻。至是始大備矣。後有大蒙古國領中書省耶律楚材。奏准皇帝聖旨。於南京時。取襲封孔元措。令赴闕里奉祀。來時不能挈負。祖庭廣記印板。今謹增補校正。重開以廣其傳。云云。後題壬寅年五月望日。考壬寅爲蒙古太宗皇后尼瑪察氏稱制元年。彼時蒙古未有年號。止以干支紀歲。在宋則淳祐二年也。是書文淵閣書目著錄。何君夢華從曲阜購得。金吾從之傳錄者。

祖庭雜記舊引

四十七代孫朝散大夫知邠州軍州事借紫金魚袋傳撰兼編類

先聖沒。逮今一千五百餘年。傳世五十。或問其族。則內求而不得。或審其家。則舌舉而不下。爲之後者。得無愧乎。竊嘗推原譜牒。參政載籍。則知鄭有孔張。出於子孔。衛有孔達。出於姬姓。蓋本非子氏之後。而徙居於魯者。皆非吾族。若乃歷代褒崇之典。累朝班賚之恩。寵數便蕃。固可枚陳而列數。以至驗祖壁之遺書。訪闕里之陳迹。荒墟廢趾。淪沒於春蕪秋草之中。魯尙多有之。故老世世傳之。將使聞見之所未□□。如接於耳目之近。於是纂其軼事。綴所舊聞。題曰孔氏祖庭雜記。好古君子得以觀覽焉。時宋宣和六年歲次甲辰三月戊午曲阜燕居申申堂記。

四十九代孫承事郎行開封府祥符縣主簿環重編。

家譜舊引

家譜之法。世次承襲一人而已。疏略之弊。識者痛之。蓋先聖之沒。于今一千五百餘年。宗族世有賢俊。苟非見於史冊。卽後世泯然不聞。是可痛也。如太常諱臧。臨淮太守諱安國。丞相諱光。北海諱融。蘭臺令史諱儋。議郎諱昱。纔十數人。非見於漢史。皆不復知矣。魏晉而下。逮於隋唐。見紀者止百餘人。按議郎本傳云。自霸至昱七世之內。至卿郡守者五十三人。列侯七人。今考於傳記。乃知所遺之多也。宗翰假守豫章。恩除魯郡。將歸之日。遽以舊譜命鏤板。用廣流傳。或須□求。以待他日。實宋元豐八年十一月二□□。四十六代孫朝議大夫。知洪軍州州事。兼管□□農使。充江南西路兵馬鈐轄。柱國賜紫金魚袋宗翰謹題。

孔氏祖庭廣記引

古之君子皆論譏其先祖之德。明著之後世。蓋先世有美而不知者不明也。知而不傳不仁也。明足以見。仁足以顯。然後爲君子。故素王之孫。穆公師子思。首論祖述憲章之道。魏相子順。稱相魯之政化。漢博士子國。復推明所修六經垂世之教。當世莫不賢之。自夢奠兩楹之後。迄今千七百載。傳家奉祀者。數嬴五十。繼繼公侯。象賢載德。如聯珠疊璧。輝映今古。於乎休哉。聖人之澤。流光如此。後之人。能奉承不墜。又如。此宜有信書。廣記備言。顯揚世美。以示于將來。傳之永久。於是襲封資政公。因家譜庭記之舊。質諸前史。參以傳記。併錄林廟累代碑刻。兼述皇統大定明昌以來。崇奉先聖故事。博採詳考。正其誤。補其闕。增益纂集。共成一書。凡一十二卷。名曰孔氏祖庭廣記。應祖庭事迹。林廟族世。古今名號。典禮沿革之始末。並列于篇。粲然完備。於國。則累朝尊師重道之美。靡所不載。於家。則高曾祖考保世承祧之美。靡所不揚。故先聖配天之德。愈久而愈彰。噫。若資政公者。可謂仁明君子能世其家者也。資政公嘗以書示予。予斂衽觀之。既欽仰其世德。又嘉公之用心。得繼志述事之義。乃磨鈍彫朽。爲之題辭焉。

正大四年歲次丁亥十月丁未朔資政大夫前尙書左丞致仕張行信

孔氏祖庭廣記引

先聖傳世之書。其來久矣。由略積詳。愈遠而益著。蓋聖德宏博。殆有不可殫者。爰自四十六代族祖。知洪州軍州事柱國。纂集所傳。板行四遠。於是乎有家譜。尙冀講求。以俟他日。逮四十七代從高祖。邠州軍州事朝散。克承前志。推原譜牒。參考載籍。摘拾遺事。復成一書。值宋建炎之際。不暇鏤行。至四十九代從祖主祥符縣簿承事。懼其亡逸。證以舊聞。重加編次。遂就完本。布之天下。於是乎有祖庭記二書並行。凡縉紳之流。靡不家置。獲覽聖迹。與夫歷代褒崇之典。奕葉繼紹之人。如登崑崙而披日月。咸快瞻仰。比因兵災。闕里家廟。半爲灰燼。申朝士大夫家藏文籍。多口散沒。豈二書獨能存歟。元措託體先人。襲封世嗣。悼斯文之將泯。恐祖牒之久湮。去聖愈遠。來者難考。迺與太常諸公。討尋傳記及諸典禮。於二書之外。得三百二事。皆往古尊師之懿範。皇朝重道之宏規。前此所未見聞者。於是增益二書。合爲一編。及圖聖像。廟宇山林。手植檜等。列於篇首。題曰孔氏祖庭廣記。其兩漢以來。林廟碑刻。舊書止載名數。今併及其文而錄之。蓋慮久而磨滅不可復得。且先聖生於周靈王二十一年庚戌。迄今凡一千七百七十八歲。其間經世變亂。不知其幾。而聖澤流衍。無有窮已。固不待紙傳而可久也。然所以規規爲此者。特述事之心。不得不然。是書之出也。不惟示訓子孫。脩身慎行。不墜先業。流芳萬古。是亦學者之光也。

記。正大四年歲次丁亥十月望日。資政大夫。襲封衍聖公。知集賢院。兼行太常丞。五十一代孫元措謹

正大四年歲次丁亥十月望日訖功

孔氏祖庭廣記 編校姓名

太學生介山馬天章畫像

禮官業進士浚儀王柔立校正

禮官業進士中山唐校正

太常寺太祝日照張籥校正

集賢院司議兼太常寺奉禮郎權博士古燕馬遂良校正

惠民司令兼太常博士富平米章校正



資政大夫襲封衍聖公知集賢院兼太常丞五十一代孫元措謹續編


小影





顏子從行














顏母山記